



FINANCE CAMPAIGNER TRAINING (AUGUST 22, 2024)

To,

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India



VAIHAWMNA DIK

- Zu leh Khamthei thil apat kiveng hitiu
- Kochuam Numei Ni Thucha
- Khanglaite & Pathianthu gen

Editor : Rev. S. Lama Vaiphei, Executive Secretary

Joint Editors : Rev. P.B Zosapthara, Consultant
: Rev. K. Jama Vaiphei
: Rev. Th. Samuel Vaiphei
: Upa Lalminsang
: Upa S. Lalpi
: Pi Hawipakkim, Secretary, CKNP
: Tv. Lianmuanthang, Secretary, CKKP

Business Manager : Pu Langlalthamuan
TPC Office D. Phailian
P.O. Box 107 CCPur-795128 Manipur
Phone No. +91 9958160325
Email - ehinnavak@gmail.com

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

1. EDITORIAL	01
2. KOCHUAM HUANG	02
3. VAIHAWMNA DIK	03
4. ZU LEH KHAMTHEI THIL APAT KIVENG HITIU	05
5. KOCHUAM NUMEI NI THUCHA	09
6. KHANGLAITE & PATHIANTHU GEN	11
7. SERMON	
a) Kilekit nachang helo i um tawl nalai diam uh?	15
b) Puitu Mosi leh Israelte ah kipat zillai	18
c) Lalpa Nungzui	26
d) Damsung Ni tiamdan	29
8. KNP HUANG	34
9. SUNNA	35

SYNOD PUIPATE

Moderator	:	Rev. Kamkhotinthang Neihzial
Secretaries	:	Rev. Thanglianlal (Sr.) Rev. Andrew LR Khiangte (Jr.)
Finance Officer	:	Rev. S. Khaikhawlam
Statistician	:	Upa S. Thongzalal
Executive Secretary	:	Rev. S. Lama Vaiphei
Consultant	:	Rev. P.B. Zosapthara

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Kochuamte'n Beigual tha thagaulam malzawlina tamtak tawh i mat thei ziaak un kipak thu gen hitiu.
2. Khawvel buaina kâl ah Kochuamte malam sawnzal thei ah i um ziaak un kipak thu gen hitiu.
3. Presbytery tin te'n Presbytery Kikhawmpi hi taksa leh thagau ah lawk tak ah i mat chiat thei na ding un pauchap hitiu.
4. Kochuam Numei Pawl leh Khristian Khanglai Pawl - Central, Bial leh Kochuam/Branch ah puitute â ding in Pauchap hitiu.
5. Gamsung buaina ziaak ah panlatu pawl chuam chuam ah puitute â ding in pauchap hitiu.

MUALPHO BELAP THEI NA LAI I HIU

Manipur solkar in ei huat ziaak un gal ei bawlkhum ua, ei thingtang mi bangma solkar ah hamphatna mumal le a la chang ngailo, dinmun se tak ah umte hi Pathian in tuni tiang in ei thatham pua, a min chu pak in um hen.

A hin ei ngawnau narco-terrorist ei ti ualeh nialna ding helo a ekche nui te i hui. A umzia chu zu leh sa leh khamthei zat chuam chuam ah sumdawnge, ziate haw chu tawh khawsak khawmte, kani lei bawlte haw a khan i kigen thiang thei puau hi. Meiteite chu ei sang ah khawk zaw le a hi maitheti ui, maleh a mau chu thuneina chawi a hi ziaak un a kigen thiang thei ua, eiu Pathian awi te chun a bûk a bêl in i khuku a hi.

A hinla, i gam a hung buai ah, mualpho kisa in a habawl zaw diak ah kilang unau ten a kochuam zawng leh a nam zawng ah ten pan a hung la tak tak ua, tuhin kani lei chu um talo gual ah hiat a hi. Zia beplo a chun Meitei zu zuak sia a kilekit tâk ualeh zu chu bei mai ding ah ngai a hi. Chuleh, i Administrative Secretary masa Rev. R. Lalhmingsanga vang khan kisuang tak in keiu Vaiphei te lak ah khamthei ah buai pi ngai ka um puau a la ti sek a hi kha.

Ahileh, tu i dinmun uh banggual ahi tam ti la ngaitua kha em? I Revival Speaker Pu Kamthang in khamthei bawl lamte etkawl na in pan a hung la, a enkawl seng ta puai. Khawpi sung ah lamlian kiang ah zan giak mai, lampi pam vel ah puan se net nut ah nen khawl na vel ah an hawl Vaiphei pau thaw a hung umto pan tai. Kochuam leh Bial khenkhat inle a mau sungthu ah a beidawn thu uh a gen sau sau tau hi. Zia gualma a chun miten a daw taklo uh zu huanna factory te, kani lei te chu ei un i thak bawl uh hileh kilawm tak in a kilang hi.

Banggual ah pan i lak ding uh a hi ta diam? Eimau mazawn chiat ah lunggel ah panlak khawm ding dan i ngaitualo ualeh khawvel mitmu ah a Kochuam zawng leh a nam zawng ah mualpho ding ah kilang i hi tau. Pauchap thak in Lalpa ang ah, mitthi pum ah tute chun kipak tak in a ga chu mu ngei in'au ti Bible in ei gen hilo a hem?



Kochuam Huang

Naupang Sunday School Kikhawmpi

Sept. 8 & 15, 2024 nite ah Bial tinte'n Sunday School Kikhawmpi chu buaina umlo ah i mang theiua, kipak a um takzet hi. Khawpi sung Kochuamte'n le a mang thei'u ti i hiat zia in le kipak a um diak hi. Naupang Sunday School hi Kochuam chiaawm zel ah i kinepnau a hi ti hemillo in, Pathian thu dik leh dettak ah a sawmto zel theina dingun Kochuamte'n nasazawsem ah ngaisak ding in panla chiat hitiu.

Finance Campaign

Sept. 1, 2024 ni ah Finance campaign chu a pumpi huap ah a ni kibang ah Bial ah leh Kochuam ahte'n lawk tak ah i nei thei chiatu kinep a um ah, kipak a um takzet hi. Campaign ding ah kalsuan dawkte zosia chun in le kipak thu i genu'i. Bial leh Kochuam tin in i lawkpi

chiat ding leh ga pha a hung sua ngei kinep a um hi.

Synod Puipate Presbytery Kikhawmpi chiana ding:

Officer's Meeting 32:4 dated 13/9/2024 chun Synod Puipate Presbytery Kikhawmpi na kalsuan ding dan zia gual a hin a thupuk ui.

Lamka South Presbytery :

Upa S. Thongzalat

Lamka North Presbytery :

Rev. S. Lama Vaiphei

Tanggam Presbytery :

Rev. PB Zosapthara

October Thasung Kochuam Nibik Ni-te:

October 10-13, 2024 :

Presbytery Kikhawmpi

October 20, 2024 :

NEICC Pauchapgual

October 25, 2024 :

Kochuam Numei Ni

October 27, 2024 :

Nauhual Ni

“VAIHAWMNA DIK”

~ Rev. Eric Lienlalmuon
Bengaluru

Vaihawmna dik ti hi khawvel pumpi ah gam zosia’n a ngai pawimawu leh a dawipenu pakhat a hi. Khristiante bep hilo sakhua chuam chuamte ziltina le muthei in aum hi. India Danpi (*Constitution*) ngei hile mizosia chung ah kigual tak leh diktak ah vaihawm ahi theina ding ah siam a hi. Zia chu ahi zinglai in vaihawmna dik mu ding vâng ma ma ta in a lang ah, vaihawmna dik dawina zia in muntin gamtin in nasa tak in kiphinna mu leh hiat thei in aum zing hi. Vaihawmna dik ti hi kawng chuam chuam a pat thil thei in ah, i Bible in vaihawmna dik Amos 5:24 na a gen pansan in vak enkhawm hitiu.

Amos hi Judah lalgam ah belum ching ah khawsa ahia, Pathian in Israel lalgam ah a thu puangzâk ding ah a guat a hi. Jeroboam vaihawmna nuai in Israel lalgam chu a lopi ma ma ah, gam leh gua a pha, nêk leh châk a niang ua, kawng bangkim ah a khawsak thei hun laitaku a hi. Thiampate malatna ah ala bawl sek uh, halmang thillatte a bawl zing sek ua ahin a

lunggil un Pathian a gamlat ua, milim siamkawmte a bia’u ah, diktatna a tasam ua ziaziakachun a thil bawlte’u chu Pathian in a pawmpiak pua a haw ma ma a hi. Zawlnei mangcha’n Israelte chung ah a lungnatna hung tung ding chu a hiatsak ah, a hi’n Lalpa lung a hawl ua chun hing in ti’u in (5:6) vaihawmna dik tui gual ah a luan sak ua, diktatna chu tui luanglet gual a chan

sak ua chun (5:24) Pathian in ngaidam ding ahi ti thu i mu'u hi.

Chang 24 na vaihawmna dik ti hi Hebrai pau a chun mishpat (מִשְׁפָּט) ahia, thutanna dik tina lam (*sakhaw thil lam bep hilo, gamsung kivaihawmna lam zosia le a huap hi*) a kaw deu hi. Vaihawmna dik tui luang gual a luang ding ti hin, zia vaihawmna dik chu tui luang gual ah bangtik lai a le chawlngalo ah a luan zing ding tina a hi. Khawitak mun ah le, banggual dinmun ah le, a neu a lian, a lal a thiam ma ang a le vaihawmtu chun hangsan tak leh dik tak ah vai a hawm zing ding a hi. A lemchan leh nekduk le khawksa lo, kuate maipha hawl chuam bîk nei, Pathianthu maiphaw a mang

ah mani dinmun siamphat na ding bep ngaitua, a mualpholona ding tiang bep ah diktak a vaihawm. Zia gual puitu (*Leader*) vaihawmna nuai a chun thilpha mu ding a um ngaipua, manthaina lampi ah ei pui ahi zaw sek a hi. Pathian zia langsal pente lak ah pakhat chu vaihawmtu dik ahina hi a hi, diklo tak ah vaihawmtute chung a chun a ma'n dik tak ah vai hun hawm ngei ngei ding a hi.

I pauchapnate'u leh thei kham kham ah Pathian na i sep na te'u Lalpa'n ei la pawmpiak ah gimtui ah ei la sânsak theina ding in i gam leh nam sung in vaihawmna dik tui gual in hung luang ta hen. Amen.

Zia **khawvel damsung** bep cha ngaitua a, **kumtuang**

hinna ngaipawimawlo chu hun **chawmcha** sung â ding

ah **mipil** ahin, **kumtuang** â ding a chun **mingol** a hi.

~ Tillotson

“ZU LEH KHAMTHEI THIL APAT KIVENG HITIU”

~ Rev. P.B. Zosaphara
Consultant

I. Zu leh khamthei in a sukkhakte:

I thupi hi gam chuam chuam in a buaipei, Sawlkar lian tak tak te le a luhai a hi. Zu leh khamthei thil chi chuam chuamte hin mihing hinkhua a subuai khawp mai hi. Nidanglai ah mi hausa chate bep in a bawl thei ua i kawi Heroine chu mitin batphâk in a um ta, Nungak-Tangval tamtak in a thihi bepulo in natna phalo kai theina a hung hita. I umna kiangua gamte hilah khawvel ah Heroin siamdawk tampente a hi kitua. Khangdawng, chanu, chapa neite â ding vâng chun luhai a um ma ma ziang tai. Kisutna/kikapna mabe umlo in a kikap theita nalaiua. A gûk bep ah hitalo in kilang tak in i khanglaiteu suhngawltu liantak a hi tai. Ziaziak a hin i chennau gam mite'n le a êng êng in ei houa, ei musit khawlaw hialu'i.

Gam a buai ziaak ah Meitei zu zuak tamtakte chu um talo in, i pha deu diamu ti a hi zinglai in a siamna munpi i tungdawk kitta zelua. Thingtang mite ei suhmangthei ding pakhat tawh i umkhawm zingu a hi ziang tai. Zungawlvei,

khamthei mamaw, a umlo ah hithe i talo mi tamtak a um tai. Ziagual mite inkuan chu a lungsiatum khawpmai hi; a chapau, chanu'u, nupen leh papen khamthei panglo ah khawsa theitalote sungkuang hi a buai takzetu a hi. Inkuan

kim in An a nekhawm thei tapuau a, kâllak leh khamthei piak a ngai sekua, nu leh pate'n lungthim na ngawi ngawi kawm in, a dam dingu le dawina zia in, damdawi/zu a chawkpia ham ham seku'i. Khamthei a bawl nasat ziaqua In leh Lo pha tak tak, lua tâk le hitalo ah mangthai leh chulta mu ding a tam ma ma hi. Zia addict-te â ding ah sum leh pai tamtak i sen mangthai sek hi ngaitua kham tak a um tai. Zia haw phatlo dan hi Kochuam, khawtang leh Insung ah i kiziltîl zel hi a pawimaw ma ma hi.

II. Zu leh khamthei thil bawl sekte um dan:

1. No. 4 hi khatvei bep kikap hin le zawngsak thei a hia, pawimaw sunzawm ding in mi a kawi sek hi.
2. La bawl zing nung phatleh a tîl ah nawpna gual kha pakhat le nei tapua'ntin, normal na ding leh thuaklona ding in la bawl sutzawp ngai di

a hi. Damdawi mangcha nawpna kisiampkawm a hi zia in thil dang a nuam zosia le um intin, limna nei thei talo di la hi. Midang chu lawite tawh lim tak ah a kithua thei laiu'n, ziagual limna chu nei theilo/phalo di la hi. Ngâwl lechun le sawtpi tak chu a nawpna umlo di a hi.

3. Suachat nuam in la tin himaleh dakkal 7 le kikaplo ah la um chun la gu leh châng zosia na'n tîn, khawsa-ul in hung chûm intin, sung hawilo leh naptui kai zing in um in la tin, zan lehle imu thei pua'n la. Ahinla, ziagual dinmun haksatakte sâng ah haksaw la thawk ding chu gu sung thak, khuat thei le hilo chu hi ding a hi. Thuak zolo in tamtak a kikhailum ziang seku'i.
4. A dawnte'n a gen danu'n zu hi a dawn tîlu'n a thum keipua, khâ sa ma

HINNA VÂK

ma kawm leh val haksa
sa ma ma kawm ah
maisi phun phun in ka
dawn seku'i a tiu. Ahinla
no khat in no ni a hing
zel a hi.

Mi'n zu ngawl a vei
takleh An in a ngansiaua,
a hatna dinga An pangai
bangma a ne nuam
tapuau. A mamawu zu
a muloua leh a taksau
ahung kithing ah, a luaku
hungsuak in, a chilu a gial
ah, zan imut theilote,
thitha mu leh mittha ah
thil phalo hung kilang
sekte hi a tut sek hi.

III. Bible in a gen dan:

1. Zu chun mi a suchavai
ah, zukha hin mi a
kinaksak hi; kuale zia
haw bawl taphawt chu
mipil a hi puai. (*Thupilte*
20:21)
2. Uain chun namtin a
sungaw zo hi. (*Jeremiah*
51:7)
3. Nunsiatna leh thagum
suana tuntun a hi.

(*Thupilte 4:17*)

4. Zukhamna chu siatna
bul a hi. (*Ephesa 5:18*)

Ziate khêllam hi
le Bible in zu dawn
phatlon a tamtak a gen
hi. Khamthei him him
chun mi pangai chu mi
ngawl a suaksak sek hi.

IV. Ngawlveina hi bang zia ah hung kipan a hi em?

Gen di tamtak um
leh le tawmcha vak gen
hitu. Mithiamte chun
ngawlveina hung kipatna
hi lunggil natna mi'n a nei
zia ah, hinkhua kaihuaitu
kitup neilo zia, lawite
genhât ziahte hin mi'n
khamthei a bawl seku hi'n
a ngaiu'i.

A enkawltu nu leh pa
leh sungkuante ah kipat
dawilonate, a taksau
leh lungthim mamaw
dawigual ah suk lawtin
piaklo ah kihiatnate leh
lungawilona chi chuam
chuamte zia in khamthei
lam ah a kipia sek bawku'i.

Mihing in a lunggil natna zosia ah kipat pumpel a h'em hiatmil a nawp ziate'n le a bawl seku'i.

Khanglai thada, a nawp leh nawplo hekhen thei viau, nawpsak pai ziang nuam, dawtheina tasam, haksatna thuak peilo, dawilawk, ama nawpsakna di bep ngaitua, semlo ah nawpsak pai ziang gawte hin khamthei bawl a chîng nuam diaku'i.

V. Khamthei lak ah bangti kiveng di i hîu em?

Gam leh nam in le pha a saklo, khawtâng Kochuam susia zinglaite hi Inkuan tin ah a phatlona kiziltîl zing hitiu in, Nu leh Pate'n i chate

khawsakna he zawm lehin. I chateu nawpsak ding zawng in insung le siam lehin. Khawlai sang ah a ngainat zawk dingua sungkuan hi etkaw! a pawimaw hi. Insung kikhawp hawitak ah nei sek hileh. Sukdam sâng in kiven a pha zawi ti thupil hi a pawimaw ma ma hi.

Khamthei thil hi a pun belona di lampi pakhat bep a um hi, nang leh kei in baw!lo lehin punbello ziang in a. Nang leh kei hin bawl nuamlo ziang lehin punbello ziang in a. Kham nuam i um sungsiaw chu a kham ding tamzawsem um di a hi. Pauchapna tawh theitawp sua in kiveng zing hitiu.

William Booth kivuina hun a chun Lengnu a va pang ah, ama kiang a chun nupi chaga takmai vansi tak mai ah kivan khat hile pakcha kichawi in a la kichu, Lengnu chun bang tidan ah William Booth hi la hiat a hi em? tin a dawng ta, zia nu chun "Keima gual gualte hi a ngaikhaw bek bek zia in ama hi ka hiat ahi" tin a dawnhu tai!

~ Christian Encyclopedia

“KOCHUAM NUMEI NI THUCHA” (OCTOBER 25, 2024)

~ *Pi Lhingkhovah Baite*
CKNP Chairman

Amasa’n i Lalpau Jesu Khrista Kochuamte luchang leh a
Aneipa min in Hinna Vâk simtute zosia leh Kochuam Numei
Ni mangthei dingte zosia Lalpa min in Chibai ka hun buk hi.

Tukum ahinle i gamsung in
Gâl a kinei ziaak in kumdang
gual ah Kochuam Numei Ni
mangtheilo ding Kochuam
KNP tamtak a um tâk ziaak
in amau zosia le Pathian in
hunpha a hung piakkit kinem
in i leng tak mai ua i matthei
kit ding u kinepna lian tak nei
ah Pathian kiang ah pauchap
zing hitiu. Amau zosia le a
umna mun chiat ua Pathian in
damna pechiat tau hen.

Tukum 2024 Kochuam
Numei Ni a hung tungkit ta.
Thupi ding in **1 Samuel 15:22**
“*Ziaphatchun Samuel in,*

*Lalpa’n a thu mat sang ah,
halmang thilpiak leh kithoina
kipakpi zaw a hem? Ahi’pen
chu, kithoina sang in thumat
a phazawn, a thu ngaisak chu
belamchal thau tak piak sang
ah le phazaw ma ma ahi.”* I
thupiu hi a hawi ma ma ziang
ah Kochuam Numei Ni mang
zosiata’n Taksa leh Thagau ah
mang phachuam thei chiat
ding in i kidawisaknau hihen
la, i Kochuam leh i Insung
chiat ua gasuadaw thei chiat
ding in Pathian in ei pui zing
ta hen.

Chuleh Kochuam Numei Ni â ding ah kidemna kiguanggal Lenkhawp La kidemna leh Bible Quiz hawle thanuam tak leh kukal tak ah pang chiat ding inle Pathian min in i kichial ui.

Numei te hi i vangpha ma mau a, Kochuam Numei Ni i nei ua, a hun a hung tungkit tâktawh kitawn in a mang mai mai hilo in i Thagau hinkhuau ah i insung chiat ua ei mapuitu in mat gua hitiu. Numei ten insung hi'n Kochuam hileh, khawitak mun hileh Pathian na i sepnau ah chim tik neilo in pang zing hitiu. Tukum Bial tin ah Seminar i neinau ah i thupiu "Taksa leh Thagau ah Insuang etkawl dan" ti hi a hawi ma ma ziang ah, Numei ten a vel vel ah simkit ah taksua chiat ding inle i kichialu a hi.

Nu te'n i pawsal, i chate leh insung â ding in bangzat vei anngawl in mitthi lung pum in i Pauchap kha tau em? "*Pauchapna a chiato ding, malzawlina hung kum ding*". Pauchapna aw-gi a thip phatleh malzawlina le kitâng ding a hi. Pauchapna in thil bangkim a sudanglam thei a, Pauchap hi ka thagau â di'n An tuipen, Pauchap aw-gi thipsaklo ding in Hinna Vâk simtu zosia Pathian min in ka hun chial hi.

Awle tukum Kochuam Numei Ni i muthei gual un Kumkit leh le Taksa leh Thagau ah damna i nei ua Kochuam Numei Ni mangkit thei chiat ding in Pathian panpina leh puihuaina chang chiat ding in ka dawisakna ka hung lân hi.

Hinna Vak sumtu zosian i phatchuampi ngei ding un Pathian in ei malzawl piak ta hen.

Mi pha leh taima chu pakchat leh chawihawi kawm a ngai puai, a chanchin leh thilbawl in a chawihawi ziang hi. Miphalo pakchat di i guat chun zuau gen a ngai khawlaw sek hi.

“KHANGLAITE & PATHIANTHU GEN”

~ Rev. S. Lama Vaiphei
Executive Secretary, TPCS

1. Thumapui: Kochuam ten mipi Pathian Biakna hi i ngai pawimaw pen lak ua pakhat a hi ban ah, mipi Pathian Biakna sung a hin Pathian thugen hi i ngai pawimaw penu hi in a kilang hi. A diktak a chun mipi Pathian biakna a hin thugentu hi a um theilo leh bukimlo gual in i ngai uh a hi. Zia gual tuk ah Kochuam ten i ngai pawimawu Pathian thugen dan hi kizil nasat ngai ma ma ziang a hi lai in, a kizil pei chu mi tawmcha a hikit hi. Pathian thu zilna huang a chun zia hi homilitics a tiu a, Pathian thugen dan tina hin a. Homilitics bik ah Doctorate tiang zil hawle a um ua, amau haw chu thugen dan a thiam ma mau hi. Tulai hin khangthakte hi thiam zaw pil zaw leh kizil thei zaw dinmun i hi zia un, Pathian thu zilna huang ah i va lut ziang theilo inle eima umna mun ah thei kham kham ah i kizil uh a ngai ta a hi.

2. Pathian thugen dan chi chuam chuam a um hi:

Pathian thugen dan hi a tangpi in chithum a um hi a tiu a, zia te chu: **Topical preaching**, a umzia chu thupi khat nei ah thugen tina hin tin; **Textual preaching**, zia umzia chu Pathian thu munkhat teldaw ah zia sung ah mi chu hilchian ding tina in ngai leu hen; chuleh, **Expository preaching** a tiu chu Pathian

thu lawm khat teldaw ah, a nung a ma leh a kimvel pha tak ah mite hiatthiam thei ding ah hilchian timai hi tiu. Tulai ah i Biak-In ua thugenna a hin i thupi ding uh i vak taklang po sek nau ah, i thupi gen guat uh hi bang gual ah bang mang ah a gen guat a hem ti ziang hile hiatthei umlo in i gen tangpiu a hi.

3. Pathian thugen kisingsak dan:

Mipi Pathian biakna hun sung ah i ngai pawimaw penu Pathian thugenna hun mangtu chun Kochuamte a chawm in a vâkva ding a hi. Zia hi thugen in a thiltup pipen chu a hi.

Pathian tawh kipawlnei hawitak nei Pathian tawh kipawlnei nei sekte hawn pulpit a lua tak ualeh a thugen dan a diklo tawp inle Kochuam mite chun nek ding a la nei thei seku a hi. Pathian tawh kipawl ti hin pauchap bep hilo in Bible simle a huam hi. I pauchap a hin eimau in Pathian i hopina ahin, Bible i sim a hin Pathian in ei hopina i ngaitha a hi a ti sek ui. Bible hi gun tak ah i sim ua, i ngaitua zui ua, i kizil ualeh hiattheilo dinga thuguk kiselgute le hethei ding i hiu. I hiatthiamlo teu kha mithiam le dawt thei a hia, Pathian ma le dawng lehen ei hilchian thei a hi.

Bible changtel Sermon kingakna Bible changtel hi pawimaw tak a hi. Bible chang khat i dawina um a pat ah zia sermon kha guanggal thei a hia, i thupi dawi tawh kituak

ah changtel ding hawlkawm le a siatna a um puai. A hin, i gennawp tawh kituak Pathian thu hi gunchu tak ah teldaw a phai. Zia i Bible changtel hi sermon hun sung a hin namat ngei ngei guat ding a hi.

Outline siam in I thupi tel a kipat in sermon outline hi kitup taka i siam masak a ngai hi. Outline a umlo zia in gensa vel gen te, thupi kaw khalo ah sermon gen zawte hi a piang sek a hi. Sermon outline siam ding chun thumal pawimaw **what, why, when and how** te hi a pawimaw hi a la ti sek ui. A umzia chu: bang zia a, bang a hem, bangtik ah tileh banggual ah ti te hi a hiu. A namat ding dan chu Topical sermon minute 30 lut ding in outline vak siam sin hi tiu.

Thupi : Pathian hepina

Changtel : Joh 3:16

1. Thumapui (*Hepina lamkai tekхина*) -**2 minutes**
2. Bang a hem Pathian hepina chu? -**5 minutes**
3. Bang gual tuk ah Pathian in ei hepi uh a hem? -**5 minutes**
4. Bangtik chan dai ding a Pathian in ei hepi uh a

HINNA VÂK

hem?-**5 minutes**

5. Banggual in Pathian hepina chu i phatchuampi thei diam uh?-**5 minutes**
6. Thukhakna (Pathian hepina pawm dinga chialna)-**3 minutes**

Outline i siamsa hi entawn ah a dawnhuna i siam zaw takleh, zia a dawnhuna zawk kha outline thei a hi. Etsakna ding in:

Thupi : Pathian hepina
Changtel : Joh 3:16

1. Thumapui (*Hepina lamkai tekhina*)-**2 minutes**
2. Pathian hepina chu a chapa ei piak hi a hi -**5 minutes**
3. Pathian cha ah eisak ziang tak uh hi -**5 minutes**
4. Pathian hepina hi kumtuang dai a hi - **5 minutes**
5. Pathian hepina hi ginna in kisan hi tiu - **5 minutes**
6. Thukhakna (*Pathian hepina pawm dinga chialna*) - **3 minutes**

Outline chungnung zaw a hin dawtna ngen in a um ah, a nuainung zaw a hin dawnhuna ngen in a um hi. Zia sermon hi a dikpen leh a hawi pen ding

ah siam a hi pua, a umdan i hiatthiam theina ding ua siam a hi.

Naupang lak ah topical sermon minute 16 lut ding in outline vak siam sin hi tiu.

Thupi : Naupangte â ding ah zillai

Changtel : Sam 34:11

1. Thumapui (Pathian thu hi hung ngaitha tiam u) -**2 minutes**
2. Biak-In ngainat ding a hi-**2 minutes**
Eg. Bible a hin naupang pakhat a mang ah a hawl ualeh Biak-In ah a mudawk ui kua a hi diam? (Jesus Lk. 2:40-52).
3. Pathian pakna lasak ngainat ding - **2 minutes**
Eg. I Bible a hin Lapawl sak ah galdo la he khau em? (II Chro. 20:20-24).
4. Kipak thugen hiatmillo ding a hi - **2 minutes**
Eg. Bible ah miphâk pakua kipak thugen ding hemil la hekhau em? (Lk. 17:12-19).
5. Midangte hepi ding-**2 minutes**
Eg. Bible ah naupang pakhat

in mipi 5000 lunch ding pawdaw kha la hekhau em? (Jn. 6:5-13).

6. Naupang laia le Pathian aw hiatthei a hi-**2 minutes**

Eg. Bible ah naupang laia Pathian aw hethei mi la hekhau em? (ISam 3:1-21).

7. Kuama musit chinlo ding a hi-**2 minutes**

Eg. I Bible ah naupang pakhat mimusit a chin zia ah a in a pat nawdaw ah um kha la hekhau em? (Gen 21:9-10).

8. Thukhakna)-**2 minutes**

Eg. I Bible ah naupang pathum, Pathian â dinga ginum suklin zawlo te kha la heu em? (Dan 3:1-30).

I gennawp a tam ah tam thupi pakhat i siam takleh i thupi lo lam lam kigen kha ziang kha a bei na ding in naupang te â ding ah zillai iti haw gual ah bang thupi gen leng le huap kha thei ding te hi siam mai sek ding a hi.

4. Pathian thugen daw k dan:

Pathian thugendaw danhi i kizil nasat uh ngai ma ma a hi. I thupi tel le hawi, i chang

kingakna le hawi, outline le kitup ma ma ngal, i gendaw k dan (presentation) a mumallo a hi chun ngaithatute â ding in a lawkpi thei tak tak puai.

A gidaw k ah: Pathian thuing gen ding i hi zia k in, i aw neisun te, i paumal ngainatum thei ding te, awnem te leh mite pawm thei ding zawng ah eima le kigen huap ding tite, aw san hun leh niam hun ding piakdik tite hi a pawimaw hi.

A gidaw k lo ah: I kichei dan, i dindan leh um dan, i mit ha dan leh i etna mun te a la pawimaw hi. Pulpit manner a ti sek uh hin i thugen daw hi tawh kithuakhawm in mite lungthim ah thu a genkhawm sek a hi.

5. Thukhakna:

Pathian thugen dan hi i kochuam khangto zinglai a hi zia k in mitamtak in a mamaw ding gingcha in, a hiat bailam thei ding pen ah hung zik a hi. Tuchung a hin Topical sermon bawl ding dan i gen ahia, hun lemchang dang a umkit ahi chun sermon chi dang te le a la suizui zel ding in kingai hi tiu. Lalpa'n a mangcha tute malsawm ta hen.

“KILEKIT NACHANG HELO I UM TAWL NALAI DIAM UH?”

~ *Upa Lalson*
New Lamka

Amasan October tha Hinna Vâk mangcha Free Sermon bawl theina ding hun mantam tak dawisak tak ah ei petu Hinna Vâk Editorial Board-te chung in Pathian min in kipak thu ka gen a hi.

Awle Pathian thu a la ngaitua khawm hitiu le,

“Hung un, Lalpa kiang lam ah kile’kit hitiu; ei puaitel chu ama ahiziak in, ama’n ei hi’dam ding ahi, ei vaw liam maleh ei tuam piak ding a hi. Ni ni zaw leh ama’n ei hi’hal ding a hi; a ma-âng ah i hintheina ding un, nithum ni leh ei kaitho kit ding a hi. Lalpa chu hia’i tiu in, hetzing gaw tai tiu; a hung kilatna ding chu phalvak gual ah kichian a hi; ama chu i kiang un gawtui gual in hung intin, khâl gawtui in lei a chapno gual in hung tung ina.” Hosea 6:1-3

Khawvel siatna leh sualnaten la kiamlam manaw gualo, hindan la danglam zo ta, hun inla ngak neilo, geldan khat ah chun lungzin um mama hileh kilawm in a kilang hi. Mihing ngaituana tawm, beidawng vak tak takte a ding in lung zînna sumpi zîng a bang ziang ta. Bitna ding gelna leh taksa damna ding ngaituana’n khawpi chuam chuam ah zindawk ah nasepna lam leh zilna lam ngaituana in, mun bitzaw i del ua, tuhin bittak in insungmite tawh khawsa khawmlo leh umkhawmlo in lungdawwna beilo maleh puakgik zangkhai tamtak i

um ding uh gingchak a um hi. Vakvai leh beidawng ah inlam kilekit na chang hedokte lak in Luka 15:11-32 ah Lalpa Jesu'n a taklatpa hih mi vangpha chungchuang ahi diam aw ka tisek hi. Taksa lam beidawwna tawpkhawk a sitkhak phat in chapa taimangpa khan chu, *"Tho ingka tin, ka pa kiang lam zuan kit ta'ngka"* ti nachang a he, a taksa lungngaina lakmang ahi bep hilo in malzawl na leh dawisakna tincheng tawh kipak tak in lamtua in a um hi ti i mu thei ui.

Kum 100 val chiata'n, Wales gam ah tuikual Skokholm ah sapkang vacha lam suitu (*Ornithologist*) mi 2 in vacha tuilak ah khawsa chikhat Manx Shearwater kiti bangzat ahem a bu apat ladawk in, a khawsaknau gam apat gam gamla tak in a puimang ui. Zia vacha lam suitute'n a hiatnawp uh chu a inlam (bu) ua kilekit nachang a he diam uh ti a hi. Vachate lak ah khat chu lenna in Italy gam mallam ah Venice khawpi puaktung a hi. Gam gamla tak, kilometre

1,463 hial ah kigamla, a gam um dan leh a hiat ngailonau himaleh zia vacha chun a bu umna Skokholm, Wales gam chu ni 14 leh dakkal 5 sung in a lengtung kit hi, ti a suidawk ua, vacha dang pani London a pawtung masau' a, zia ah kipat chun lenna in Boston, America a tut kit ui. Boston leh Skokholm kigamatdan chu 4,919 kilometre a hi. A gamlat bekset ziakin vacha khat chu lamkal in a thiden tai. A damsung pen, vacha chu AX 6587 tia teptena kibawl chu Boston khawpi ah thadaw ahi nung ni 12 leh dakkal 12 sung in a bu umna a tungkit hi tin a suidawk kit ui. Ziagual ma ah chun vacha chi chuam khat Albatross kiti Philippines gam ah thadaw ah um chu a umna ngai Midway Island, Hawaii, kilometre 6,630 hial ah gamla chu ni 32 zaw in a tungkit hi ti a hi. Zia vachate hin bangti dan ah gam gamla tak ah puimang hi ziang leu le inlam (bu) tungkit ziang thei sek ahi diam uh ti lungthim in ngaitua zui leu hin nawp um ka sa a hi.

HINNA VÂK

Matthai 6:25-34 ah Jesu'n lungkham lo ding ahi dan thuhilna a neilai in chungleng vachate sang ah "gam cheng in la lul zawu" ati a hi. Zia vachate sang ah lulzawte hin bang atia haksatna i phutkhak phat ua leh lungkham leh beidawng ziang sek i hi diam uh? Mihingte sang ah niamzaw siam vacha in bawn inlam kilekit nachang a hiat ua leh bang atia amau te haw sang ah lulzaw leh thupi zaw ah siam mihingte hin lungkhamna kulpi apat Pathian lam zawt kit nachang heseklo i hi diam uh maw?

I vakvainau la a sawt ta, khawvel i khualzin nau gam ahinla chawlna ding leh nawpsakna ding a tampua, ei henem thei ding leh sawmdawl thei ding mi a tawm siat tawh, thavai leh lungkham ah bangchan um a bangtik leh Pa kiang lam kilekit vaisawm

ding i hiu em? Gingtu tamtak hinkhua ah thilkhawk takmai khat chu haksat hun ah Khrista ah i chanvo uh leh Pathian hina diktak hiatmil khak sek hih a hi. Pathian thutak vâk ah khawsak ding ngaitualo ah vâk ah Pathian thugen kha thim nuai ah i hiatmil ziang seku hi gingtu pitinglo hinkhua a hi. Zia gual chu hilo in, a nuam in le a hak inle Pathian ah kibulphu zing ding in Sam ziktu pauchapna hi eiu pauchapna le hizing ding in kilân thak hitiu a ti a hi.

Sam 71:3 ka kiselna leh kulpi det, ka hukdamna ding ah thu pepa la hi'n, ka bitna suangpi leh ka kiselna la hi ngal a. Simtu dawitakte, Pathian lam a kilekit na chang he a i khatlaw ua, Pa Pathian lam ah kilekit i hitheina ding un, a thu simtu zosia Lalpa'n gasua ding in ei malsawm piak chiat ta hen. Amen.

La thil **ngaituate** ah **pilvang** in, la **hinkhua** la
ngaituanate **bawltu** a hi.

“PUITU MOSI LEH ISRAELTE AH KIPAT ZILLAI”

~ Pro. Pastor C. Kailianson
S. Munnuam Pastor Bial

“Chuleh Mosi chun a kiang in “Ka lak ua la hung panlo ding leh zia tak ah kipat hin ei pui to dê ziang ta’n, Keima leh ka mipite hin lei kitawnpi lo ngal leh, la mittung ah um ka hui ti bangti’n hethei ding ka hui em? Lei chung zosia ah mihing leh la mipite hin kikhiakna ka neisun’u chu, nangma ka kiang ua la hung kilâk sek ziaak bep hilo a hem? a tia.” Exodus 33: 15-16

Thumapui: “Puitu, Hotu, Mapuitu, Lamkaitu, lawiupa” i tite zosia hi paumal chuam chiat himaleh a kaww kibang in a ngai thei mai awm hi. Tuni i thupi zil ding ua hin zia paumal cheng hih a pawimaw dan zil ah mang kwal vel vel ding i hui a, a kâwk kibang ah ngai vek mai ding a hi. *“Mipi a nungzuitu ding leh tawsawttu ding umlona ah chun Puitu, Hotu i tite hin lulna leh phatchuamna a um puai, ziaziakchun, Mipi a pawimaw masa a hi”* ti hi thu kigen tam ma ma ziang, thudik tak chu vang a hin, ahinla, khawvel umlaisia chu mipi pui ding hi

bei ngai ngailo ding a hi ziaak in “Puitu Pha” gen tam, siam tam, kizil hât, hi pawimaw ma ma in ka hiai. Inkuan tin, i gam leh nam, i shakhua leh Kochuam tin ah i mamawu hî in a kilang hi.

Puitu pha leh puitu phalo kikâl hi a kikâk ma ma ziang a, Puitu pha umna chun mipin thamuanna leh lunggel hisel a nei sek’un, Puitu pha umlona mun ah chun mipin taksa leh thagau in a thuak sek’u a hi, zia hi a diak tak mai in Kochuam sung ah hin a kilang ma ma ziang a, i kochuam sung ah hotu i neite hih, hotu

HINNA VÂK

pha a hî ngei theina ding ua a kisiâm'û, a kitât hiam'û a ngai a, mipite'n le zia thei ding ah chun pan i lâk'û a pawimaw tak zet hi. Mipi leh Hotu kikâl ah sephawmna pha a um chu a pawimaw masa pen vâng a hi nai, ahinla, mipi fello leh phalo umna ziang inle hotu pha chun mâ lâ in, a chawlsan ziang ngai pua, ga phalo tam tak lak in ga pha neukhat bek a ga sak gaw tei tei hi.

Hotu Pha hî theina ding ah chun nei ding tam tak um ngei mai in a, ângmasiallo, mipi pui thiam: mipi suklungawi thiam, lungawl thiam, lunglian, mi tawsawt thiam, kam thiam, diktak, ginum, gintâk, thamuan thiam, a hun chet chet ah gen di he leh a dang dang tam tak um ina, zia haw cheng cheng nei theina ding a chun kum leh tha bep hilo in tuakhiat (experience) le tam tak nei ngai ina, ahinla, a pawimaw pen ding chu a puite-â ding ah kipezo, a thei lai sia mi zosia phat tânggualna ding ah lunggel nei, malatu hî a ngai hi. Khrista Kochuam-â ding ah hotu ding chu vang zia khel lam

ah hin Khrista ah mi piangthak, Khrista –Kochuamte Khrista'n a hepi gual ah hepina tawh puitu, hotu hî a ngai hi. Khrista hepina leh lungsiatna panglo ah dân leh mual enkawl, kochuam kivaihawmna khâk tan-te, thupûkna siam Pastor leh Upa tam tak ziaziak a hin sawisel leh dem in i um seku a hi. Mizosia lungthim vâng veng thei a hi kei puai, ahinla, Khrista hepina tawh thutanna, thupuknate chun mi lungthim a suhna maithei, Khrista hepina chun hun hung chial zel in hiatthiam sak in lungthim natnate chu a tuam dam zel sek a hi.

1. Mosi hun lai ah Israel-te

Mosi'n a pui Israelte hih kum 400 vel sal tângte a hiu a, suak leh sal a hî vang un a pung ma ma ziang'ua, amau tân sak tute sâng in a tam gaw zaw hial tau a hi. Salte chu nasem gim, mi thunuai ah um zing, lungneu, mani ah kisuanna (confidence) nei tawm ma ma hi ding a hiu. Numei, naupang leh pawsal kum 20 nuai lam simlo in 603,550 vel a hiu a (Kisimna Lekhabu 1:46). Levite, numei

chapang leh pawsal kum 20 nuai lam te tawh sim khawm in mipi nuai 20 lam hi ding ah gingchat a hi. Zia haw zosia hih Mosi'n saltâna kipat a hung pui dawk a hi. Namen hilo ding a hi! Zia mipi lungneu ta, kingaisia ta, leh mani kisuanna nei talo te, hung kaihuai ah, mani kisuang tak ding leh Pathian ah nasa tak ah kinga ding ah hung ziltîl ding chu na bailam tak hilo ding a hi. A miziau vak khaihawm vak leu hin:

- i. **Mosi nung zuitu:** Mosi hih a la suang khawp mai ua, Pathian in a umpi ngei hi ti le a hechian ma ma'u a, thilmak a bawlte leh Pathian in a matchak dante mit ah mutu a hi zia un, a nung a la zui'u a hi.
- ii. **Gamthip ah vakvai:** Kum 40 lam hial Mosi puihuaina nuai in gam thip in a vakvâi ua, nek leh châk, dawn di zosia chu Pathian in a kinga tawp mai ua, Lalpan a nek kawm ding'u a pe zing hi.
- iii. Pathian ah kipat dân leh mual, zek leh chan (sel leh

sâng) a dawng'u a hi. Zia hin Pathian tawh a kitimat ziau, leh khat leh khat kikâl ah a kilaichinnau det zia a suhlang hi.

- iv. **Sawisel hat leh ginglâ te a hui:** Pathian ah kipat Mosi thilmak bawl mu zing leh Pathian thil hî theina muzing tute a hî zing lai'un, sawiselnâ dim, ginglâna dim mipi a hi zing ui.
- v. **Ginna leh launa ah puihuai in a um ui:** Pathian ah ginna ah pui in a um ua, hun tam tak in, masang di kichian tak ah hetlona zia un launa'n a dim ua, a châng leh genmang tak, a châng leh hel tak in a um sek ui. A dinmun'u ngaitua in, awimaw a um kei puau hi.
- vi. **Phung leh chang ah kikhen in a kikaihuai ui:** Nam 12 tak um khawm a hi zia un, a nam nam in, a phung phung in a kikhen ua, a phung upateu in a kaihuai ui.

HINNA VÂK

vii. Milim biakna leh genmatlona a tam hi:

Pathian hing neitu Puitu Mosi kaihuaina nuai ah um a hi vang un, hun tam tak in Milim biak na lam in a la awn sek ua, genmanglo in nasa tak in a thawk khawlaw sek ui.

viii. Gam tiam kinepna tawh khual zin a hiu:

Pathian in gam a tiam piakna gam chu Kanan gam a hia, Mosi leh a pui dawk mi tam zawte hin zia gam tiam gam chu a lua puau hi. Ahinla, Lalpa'n hotu Joshua mang in a suan leh pâkteu tawh a puilut tho tho hi.

Zia mite haw zosia puitu, Mosi leh a puite ah kipat zillai zil ding ihu.

2. Mosi mizia leh nungchang

Mosi hi Amram leh Jochebed chapa a hia, Aigupta-te lengchanu Bithia'n a chapa ding ah kilâk in Aigupta leng In ah seilian a hi. Ama hih Aigupta thiamna zosia leh pilna zosia nei ding ah gingchat a hin, a hun lai ah mi ngaisân leh suan um ma ma hi ding ah ngai a

hi. Pathian guanggalna in a chipite a panpi zia in tual a that a, Aigupta lalna nusia in gam gamla tak in a kisel mang hi. Zia mun ah hin Pathian kona dawng in Israelte saltâna ah kipat puidawk ding in hotu ah Pathian in a guat a hi. A mizia leh nungchangte neu khat vak zil khawm hi tiu:

i. Kingainiam leh nun tâwm:

Mosi hi mi kingai niam ma ma ziang leh a titlona kihatchian ma ma mi a hi (*Exodus 3:11, Numbers 12:3*)

ii. Ginum: Mosi chu Pathian leh a thupiak in a gintâk ah, a ginum hi. (*Exodus 40:16, Joshua 1:7*)

iii. Hangsan: Mosi chun bang tik lai a le a pawimaw hun in hangsanna a tâklang sek hi (*Exodus 5:1, 14:13-14*).

iv. Dawtpiaktu, Palai pha:

Mosi chun Pathian leh a mi Israelte â ding in Palai na a sem zing a, Pathian mi Israelte â ding in Pathian phatna leh ngilneina a dawtpiak zing hi (*Exodus 32:11-14, Numbers 14:13-*

20).

v. Mosi chu, leichung ah mi zosia lak ah thunuaigawl leh nunnêm pen a hi (*Numbers 12:3*).

vi. **Kipezo:** Mi kipezo tak a hia, Pathian in a dawî dan tak ah a mipiten a zui theina ding un a pui huai zing hi (*Deuteronomy 6:4-9*).

vii. **Dawzo:** A dawzo ma ma ah, haksatna leh sawiselna lak inle Pathian aw a ngaichang gua ham ham hi (*Numbers: 20:2-13*).

Mosi hi puitu pha leh phalo a hî chu mi tam tak ngaidan kibang khel puan a, a hinla, Pathian nei puitu, mi piangthak puitu a hî vang nial guallo in I bible in a mu thei hi. Keima mimal ngaidân tak in vang a chung ah a mizia kigente haw zosia et in Mosi gual ah mizia leh nungchang nei puitu pha zaw um ding in ka gingchalo a hi.

3. Bang ziaak ah Mosi gam tiam gam lûtlo a hi diam?

Thugen thiam minthang tak

tak leh ei lak ah thugentu tam tak in pulpit tâng i gen tam ma mau chu, “Mosi’n gam tiam a lûtlo ziaak hi “ka” a mat ziaak a hi,” ti hih a hi. Mosi hin, Israel chate tui a piak khan Pathian in a piak hilo ah ama’n a piak gual ah a gen ziaak a hi a ti sek’ua, pha tak cha i suichian chun Mosi’n Israel chate Kadesh mun ah dangchak tak ah a um lai ua khan tui kha a ma piak gual ah “ka” mang ah a piak gual a a genna hih mu ding a um puai, a ziaak hawi tak cha kigen chu Numbers 20:12 ah chun, “Himaleh Lalpa chun Mosi tawh Aron kiang in “Israel mipite mit mu ah ka thianthona etsak ding ah keima lei taksan zawlo ziaak un, zia mipite hin a lua ding ua gam ka piak chu pui tunglo ding la hui” a ti a hi.

Puitu mani minthanna dawî, mani pakchat ding dawî hileh chu zia lai tak ah Pathian in thu a gen zaw ah hin Mosi hin Pathian kiang ah ngaidam dawn ah a thûm hut hut kimu ngei ding a hi. Thupi ma ma leh ettawn a tâk ma ma na chu, kam khat ziang inle Pathian

HINNA VÂK

kiang in gam tiam chu lût ham ham ding in a dawtna le a kimu pua, a gimna zosia, a panlâkna zosia a genlat lam le a kimulo a hi. Pathian in a chung ah vai a hawm piak gual in lungawi tak in a nâ a sem zawm a hi. Tulai, puitu, lamkai leh Kochuam puitute'n i taksap ma ma'ungchang leh mizia khat a hi.

Mosi'n gam tiam a lutlo zia khat ngaidân chuam chuam um te vak en khawm kit hi tiu:

i. Pathian lopi zia kilatna ding in: Israel chate â ding in Mosi chu a lopi ma ma ziang ta, a hotu'u a hî bep hilo in, Israel mipite lak ah chun Mosi hatna leh felna zia, lem hiatna zia leh pan hâ lâkna zia ah pui dawk ah um hi ah kihiatna a lian tai. A pui dawktu diktak chu Pathian a hia, Mosi chu a matchak mai a hia, Israel mipiten Mosi zia hilo in Pathian lopi zia, Pathian zia leh zal ah saltâna ah kipat pui dawk, gamtiam ah pui lut ah um ding a hi ziau sukatna ding Mosi gamtiam lutlo hi in Bible thiam tam tak leh Historian

tam tak in ngaidan a nei'u a hi.

ii. Lalpa'n hotu leh puitu tam tak a nei hi: Israel mipi te lak in Mosi tilo hotu leh puitu tâk a mau pui thei ding umlo ah gêlna a lian hi. Pathian sâng a le Mosi ah ginna kingakna a lian hi, Lalpa'n hotu leh puitu tam tak a nei in, Mosi nungzui Joshua mangcha in, Israelten a kinep phâk keilo'u puitu mang in gamtiam a lutpi hi.

iii. Mosi mizia diktak zeetna: Lalpa'n Mosi a kolai ah khan nasep ding a piak chu a mipite saltâna ah kipat pui dawk ah, gamtiam lûtpi ding ti a hi, na gim tak in a sem a, sawiselna leh thangsiatna nasa tak thuak in, suang ah selup ding hial thuak in Pathian in nâ a piak chu a sêm a, a tâwp in, a bawlkhialna neu cha zia in gamtiam Israel mipite lûtpilo ding ti a hi. Zia hin, puitu tam tak i nawk ngei'u, i lungawilo ngei'u gingchat a um hi. Ahinla, Mosi chu neu cha

ziang le lungawilona a nei pua, gâl ah pat gam tiam a thîl thaw mai mai chule a lungawi ma ma ziang hi, zia hin Pathian patepna a suhlawting ah, mihing mitmu bep hilo in Pathian mitmu in le a ngaisân um a hi, a na semtu, ama Pathian bep minthang di dawî, ama Pathian bep chungnung di dawî a hi zia a suhchian hi.

4. Puitu mizia ding Mosi ah pat zillai

Puitute taksap zia i gam dinmun, i kochuam dinmun te et in a kichian deu deu a, zia gual zel a hi i chia zel'u chun, i maban ding'u hi a thim ma ma ziang hi. Puitu, mani lawklona ding ah nasemlô a kitam deu deu, gam leh nam, kochuam leh mipite Khrista hepina tak taklo tawh nasem a kitam deu deu hi. Khawvel chia dan i et vang chun kiam lam a manaw pua, i tu leh chateu khankhua ding ngaitua in a thim khawp mai hi.

Hotu leh puitu ding, Kochuam ah puitu ding vang chu Khrista ah pianthakna tak tak neilo ah puitu hî khak ding

a lau um talua a hi. Khrista ah pianthakna neite chu a hun tak in Thagau Thiangtho puihuaina tawh kingainiam tak in puitu na a sem sek'ua, a kîm leh kiang ah umte'n taksa leh thagau in thamuanna a dawng sek ui.

Kochuam ah Pathian nasemtu tam tak, chapo tak tak ah pau, thanghuai tet tut ah nungchang nei, thil neu cha cha lungna pai pai ziang, dawzawna umlo ah thu vaitan chet chet ziang mipite kam ah kipat gen a tam ma ma ziang ta a hi. Asep gimna leh a panlâkna hiat phâk ah a umlo tak leh nuak kawm ah lungawilo pai pai ziang, Pathian thu ah kituai thak sâng ah a thuk kitna ding ngâk ah lemchang hawl zing puitu i kochuam leh khawtâng lak in gen ding a tam ma ma ziang ta a hi.

Zia gual dinmun a hi tâk ziaak hih hi ding a hia, i kochuam malâkna'u leh i nasepnau in Khrista a kilangzo talo a dia aw a ti thei hial ta a hi. Mosi gual puitu umna ah chun Pathian lemsak a hi phawt chun i sep gâ te, a lawk i mu dingte gâl ah

HINNA VÂK

thîlna bep mai in le lungawina a um a hi! Paul chun *1 Tim. 6:6* ah chun “Lungawina tawh kithua ah Pathian ngaisakna hi lawkna thupi tak chu vang a hi him hi” a ti a hi, zia hi tawh saisan in “Lungawina tawh Pathian nasep chu lawkna a hi” ka ti nuam a hi, Pathian ah pat lungawina neilo puitu chun a Pathian nasepna in kipakna him him leh lungawina ding him him nei ngai ngai pua’n a, i dinmun ah lungawi tak ah a nasem ding ah ko i hi ngal un!

Thukhâkna: Kochuam leh khawtâng a din lai sia, mipi pui ding kivât ngai ngailo ding a hi. Mipi pha leh mipi fel in hotu leh puitu pha a siam ngei mai hi. Chun, mipi pha leh fel te nung in hotu pha leh puitu fel a um deu zing tângpi hi. A hinla, Israelte gual ah mipi: ginglâna dim, mipi hel, mipi sawisel chîng i pui huai lai inle, Mosi gual ah Pathian ko, Pathian mattâk hotu, puitu hî i hî vek’u a ngai hi. “Lalpa lei kitawnpilo ding leh zia gam ah chun ei pui da ziang in, nangma zia k bep ah miten ei hiatu, miten ei za’u, mite’n ei simmawlo’u

ka hiu” ti thei, mipite-â ding ah ding ngam puitu Mosi gual i hiu a pawimaw hi.

I nasepna gê sum leh pai leh lawkna dang i mute bep tawh i te kâk khak chun Pathian ei kona tak tak suhpiting zolo ding i hiu. Kuale hotu ding leh puitu ding ah guat leh ko ah umte chun zia puitu nâ mawpuakna i sukpitin ding a um vek hi, Lalpa Jesu’n puitu te um chan ding kichian tak ah a gen chu Matthai 20:26 ah khan “Himaleh, nangmau lak ah chun vang zia gual chu hilo ding a hi: (Puitu ding chu) la lak ua a lian pen ding chu la suak ua a pan diu a hi” ti hi lungthim ah vawp zing kawm in Khrista Pathian chapa ziang le “nasem ding leh mi tam tak tatna ding leh a hinna pe ding ah hung a hi zawi” a ti gual in, a na I sep’u Khrista gual ah kipadam lo ah, kingainiam tak leh suak gual ah puitu na, i Insung tin, i khawtâng leh Kochuam ah sem ding in i kichial’u a hi. Lalpa’n ama â ding ah puitu hawi tak hi chiat ding in ei siam thak chiat tau hen!

“LALPA NUNGZUI”

(Joshua 3:1-17 ; Genesis 35:2-4)

~ *Pro. Pastor Genlemthang Suantak*
Mata Pastor Bial

Tuni hun ahin ei uh gingtute a ding ah Lalpa nungzui na ahin khawi lam lampi'n ei pui em Lalpa nungzuina ding in eima lam apat bang bawl a pawimaw em ti te leh Lalpa nungzuiten bang a changu em tite hi i puitu masau teu Joshua le Jakob a pat saulo holim khawm hitiu.

1. Lalpa Nungzui: Joshua in a mi Israel te kha a pui lai a khan Lalpa thu piakte zui zing kawm in a mite ginum leh titak tak in a pui a hi, Jordan lui a kân masang ngeiu khanle a mi Israel te kiang in Pathian bawm thiampu ten a puaku kha a nungu tawng zani kikak ah a zui ding un thu a pia a hi. A mi Israel ten le thumang tak in Pathian bawm kha tawng zani kikak in a zuu a hi, zia thumang tak ah Pathian thupiak Joshua

apat hung pawt a zui ziaak un a keng ua tui neukhat le chek lo in Jordan lui a galkai tau a hi. Israel ten le a mang ua Jordan lui lianpi um maleh thi leh mang ding gello in Pathian thupiak a zui mai ua Pathian bawm nungzui in a kipat ziaak un Lalpan a malam ua thil lopi ala bawl piak ah Jordan lui ala khen piak mai a hi. Tulai gingu ten le i hiat zing dingu chu Aigupta apat Israel khuaizu leh bawngnawi luanna gam ah

HINNA VÂK

Juda-te puiluttu Pathian kha tuni hun ah eiu Pathian le ahi zing ahi ti i hiatmillo dingu a hi. Mihing i hinau ah i hinkhua ahin genthei na mangbatna leh damlo nate i tuak ding mawngu ahi ahin lah Israel ten Lalpa nung a zui gual un ei unle Lalpa nung zui leu hin ei puitu i Pathian in thimlak ah-te thina khuk ah-te leh ling leh khau lak ah ei pui lutlo ding a hi, Thumang tak ah Lalpa nungzuite chu a zui lai un haksa thim maleh a tawp na chu khuaizu leh bawngnawi luanna gam ah Lalpan ei puilut ngei ding a hi.

2. Kisukthiangtho: Lalpa'n a chate hi thil dang tam tak lak ah kisukthiangtho ding in a daw i a hi, pawlam thiangtho na sang in Lunggil thiangtho na hi Lalpa'n a daw i a hi. Joshua khan le a mi Israel-te kiang a khan *"Kisukthiangtho un, zing leh Lalpa'n la lak ua thilmak hung*

bawl ding ahi ngal a", thumang tak in Israel tele a kisukthiangtho ua Lalpa khut ah a kikawl sak ziak un Lalpa'n ama lam ua Israel mite that chimit thei nam lian tak tak Kanaan mite, Hit mite, Hiv mite, Periz mite, Gergash mite, Amor mite leh Jebus mite khat haw kha a la nawdaw piak mai a hi. Jakob ngei le Bethel ah a chiato kit ding a khan a insung mite kiang a khan *"La lak ua gamdang Pathian um zosia pai mang unla, ki hithiangtho un"*, ti in thu a pia Jakob leh a inkuan tele thumang tak in a kihithiangtho uh a hi, Lalpa'n Jakob lunggil thiangthona a muchian ah hi ti hin Lapa'n Jakob kiang in a gen ta a hi *"La min Jakob ahin, la min chu Jakob hi ta puan tin, Israel hizaw tan la"*, inkuan pa khat mai mai hima leh Lalpa'n a thumatna tele lunggil thiangtho ahi a mu chian ziak in khawvel

tawp tiang ah min mang
talo ding Israel hi ding in a
namdet ta a hi.

Lalpa'n Israel mite a
kisukthiangtho ziaak un
Lalpa'n a chawihawi ah a gâl
miteu le amau sat ngailo in a
la nawdaw piak a tichun gam
tiam gam a puilut a hi. Tu hun
ah eiu gingu tamtak te Lalpa
nungzui kahi ti ngal ah kipakna
nei theilo i hi chun i kietthak
ngai a hi, lunggil thiangelo
pum ah Lalpa zui kha lahi em.
Lunggil thiangtho tak ah Lalpa
zui techu Lalpa'n mualpho in
a kawî ngai pua a umpi sek
ah khawvel haksat nate tawh
a chuam khen sek a hi. Tuni
hun ah eiu gingu tuten Lalpa
nung i zuinau ahin pawlam
bep thiangtho sunggil lam
thiangtholo mi bangzat a hem
ki um maithei a hi, hun i nei
sungu hin Lalpa pawm tâk ding
in i lungthim te suhthiangtho

thak hitiu, lunggil thiangtho
tak ah Lalpa nung i zuiu chun
Lalpa'n i malam ua thil haksâ
i tuak ding teu apat ei chuam
khen intin i kinepna khel lam
ua gam nuam leh gam lopi ah
Lalpa'n ei puilut ding a hi.

Lalpa nung i zuinau ahin ama
i kipuisak dingu a hi, mihing
ten eima thiamna i suang ah
i chiaphat leh kâ na lampi a
kilut kha sek a hi, Lalpa'n mi a
pui tak lechu hepi leh duat tak
in a enkawl ah a tawpna chu
lawting nate kipakna ten a zui
sek hi, chun Lalpa nung i zui
na ding ua hin thildang tampi
um ma leh a pawimaw pakhat
chu lunggil thiangthona hi a
hi, Lalpa'n Ama a thiangtho
gual in a nungzuitute le i
thiangtho dingu ei dawi a hi.
Lalpa pawmtak hithei ding in
i lungthim teu hithiangtho in
kilân thak chiat hitiu.

~ Mi tamtak gentheina ziaak chu sum hawldan thiamlo ziaak hilo in, a matdan
thiamlo ziaak a hi sek hi!

~ A dik a hi ti hezing pum ah bawl diaklo chu dawilawkna kidakumpen a hi.

“DAMSUNG NI TIAM DAN”

(Sam 90:12)

~ Pro. Pastor Lamgouliau Hatlei
Panglian Pastor Bial

*“Ka damsung niteu tiam dan ei hil inla, pilna lungthiam ka nei
khawlaw hial theina dingun.” Sam 90:12*

Pathian mi Mosi pauchapna thupitak mai ahun taklang ua. Mithiamte chun Sam 90na hi Sam lak lak ah upa pen hi ding in a ginchau a hi. Israel chate gamkeu, gamthip ah a umlai ua Mosi’n zia Sam hi a zik ding in a gingcha bawk u’i. Zia Mosi pauchapna pat hin mihing hinkhua chawmdante, dengdeldante, a luldante in pilna lungthim i mamau danteu muthei in a um hi. Zia chu ngaitua khawm hitiu.

1. Damsung ni chawmdan leh dengdel dan:

Mihing hinkhua chawmdan leh dengdel dan i hiatheina

dingun Bible chang mun chuam chuam ensuk hitiu.

- i) Zan Ven Khat (*Sam 90:4*):
Juda te zanven sim dan in hun thum in a gen uh a hi.
a) 6:00 PM – 10:00 PM,
b) 10:00 PM – 2:00 PM
c) 2:00 PM – 6:00 PM. Zan ven khat chu dak kal li vel a hi.
- ii) Khutpek (tuk) khat bep a sau (*Sam 39:4-5*) zia hin hinkhua a saulo dan a gen hi.
- iii) Lîm (Shadow) (*Job 8:9; 1 Khangthu 29:15*): Mihing hinkhua chu lîm, a tak le hilo bei kit gual mai a

dengdel a hi.

iv) Hatkhat (*Sam 144:4*):
Mihing hinna chu i hat
theina zia hi ahia. I hat
theilo leh a thi i hita mai hi.
Hinna dengdel dan chawm
ma ma a hi dan chu i hat
na hi a tena mat a hi.

v) Sûmpi hung kilang a
mangkhit gual bep in a
tekak hi (*Jakob 4:14*)

vi) Mihing hi hampa gual
bep i lopinau le lo ah
hampa pakcha gual bep
ahi ti a hi (*I Peter 1:24*).

Pathian ngai ah chun kum
sang khat hi le zani tumta gual
bep ahia (*Sam 90:4*). Chuleh,
Peter chun kum leh phat
mihing ngaidan leh Pathian
ngai kikhiak dan hiti hin a
gen hi, "*Lalpa ngai in Nikhat
hi kumsangkhat gual ahin,
kum sang khat le Nikhat gual
ahi,*" ati'i. I Bible chang taklat
te apat in mihing hinkhua
chawmdan leh dengdel dan i
mu thei hi.

La phuaktu'n '*Damlai ni
mangthiam ding in ei pui in*' ati

gual in, damlai ni i mattheina
ding in Mosi pauchapna ah
damlai ni simdan, matthiam
dan i hiatheina dingun pilna
lungthim Pathian in ei piak
a kul takzet a hi. Solomon
in khangdawngte a thuhilna
ngaithai tiu: "*Aw Khanglai
la khangdawng lai ni hin lim
inla, la lenlai ni hin la lungthim
chu hilim inla, la lungthim
dawidan leh la mitmu
nawpdan a chun chia in, ahin
zia haw zosia ah hin, Pathian
vaihawmna hun pui lut ding
ahi ti hezing in*" (*Thugentu
11:9*). Damsung hun a Pathian
panglo ah mangtute chun
vaihawmna lau um tak tuak
ding a hi (*Amos 4:12*).

2. Hinna luldan/mantamdan:

Hinkhua luldan i hiat theina
ding tuanthu khat gen hitiu.
Mi Pakhat hi Pathian kiang in a
va chia a, "*Hinna luldan bang
ahem?*" a va tileh, Pathian
in suang tangkhat a pia, "*Zia
suang hi a luldan va hechian
in la, la hun zawk lo ding a hi,*"
ati. Amapa chunle suang chu
a la, kawmla zuakpa kiang a

HINNA VÂK

chun, “Zia suang hi bangzat a man diam” ava tileh, kawmla zuakpa chun, zia suang tesetset (*suangmantam*) chu a mu in mipa kiang a chun, “Ka kawmla pum 12 kilak in la, la suang chu ei pia’n,” atia. Amapa chun, “Ei ngaithiam in, Pathian in ka zawk ding a phal puai,” atia. Aban a chun, mezuakpa kaing in a chia ah, “Zia suang hi bang zat a man diam?” ti in a va dawng a. Amapa chun, “Ka allu (*potato*) dip khat hi kipuak inla, la suang chu ei pian,” atia. Ama chun, “Ei ngaithiam in, Pathian in ka zawk ding a phal puai,” atia. A zaw a chun Sana zuakpa (Jeweller) kiang in, “Zia suang hi bang zat a man diam?” ti’n a va dawt leh, sana zuakpa chun, “Dangka sangsawm hun piang ka,” ala tia. Ama chun, “Ei ngaithiam in, Pathian in ka zawk ding a phal puai,” ati kit a. A tawp ah chun suangmantam zuakpa kiang a chun a chia ah, “Zia suang hi bang zat a man diam?” a va ti leh. Dawr nei pa chun puan san khat

hi apha ah, a chung a chun suangmantam san (Ruby) chu a kawi ah a kimvel, a kimvel a, a zaw in, a bawkkhup a, a luchang in, Suangmantam chu si in chibai a buk in hiti hin a hun dawnhu tai: “Khawitak ah kipat zia suangmantam hi la hun lak khak ahi em? Zia suangmantam, man tam dan hi khawvel pumpi leh keima hinna hi kizuak lele zia suangmantam a thawh ah la mu hi, chawzo pua’na,” atia. Zia mipa chu Pathian kiang ah a hungkit ah, a thilhiatdan a hung gen tai. Pathian in mihingte hinna a luldan, a mantam dan a zilsakna pat in a hechian thei ta a hi. Ei hawnle zia tuanthu apat ahin i hinna mantam dan hechian tei ngei hitiu.

Hinna a lul a, hinna a bei phat leh i thilneite le bangmalo mai ahita a hi. Jesu’n min khawvel pumpi nei henla a hinna chôn leh bang phachuam ding a h’em? ti in dawtna a la siam ahi kha. I hinna thasang a bang ahem i piak tak dinguh? (Marka 8:36-37).

3. Damsung ni bang gual a mang ding?:

La phuaktu'n 'damlai ni mangthiam ding in ei pui in,' ati gual in, ei unle, Mosi pauchapna leh zia La mang in pauchap hitiu. Damlai khawvel ah i damlai ni i matthiam leh i matdikna ding ah khawvel pumpi'n a matu chu sana (*clock*) a hi. Sana hi i kipuisak lai siau chun i hun i mang dikua, a lulna le i mansualo uh a hi. Ei hawhin sana hi puigua'n, i nawp dan dan in hek vel taleu hin, buai vek mai ding ahiu a hi. Gingtute a ding ah i sanau chu Pathian thu a hi. Pathian thu hi i keng a dinga thaumei leh i lampi a dinga vak a hi (*Sam 119:105*). Pathian thu bep in i lunggil pilna ei pe thei a hi. Bible in a gen gual in Pathian launa chu pilna bul a hi (*Thupilte 1:7*). Pilna zosia kipatna chu i Pathian uh a hi. Pathian a masa kawite chun pilna a mu hi. Leng Solomon in a chapa a fuina chu "La lampi zosia'n ama chu dawng zingle chun, aman la lampi hun

siamzan piak ina" (*Thupilte 3:6*) atia. Pathian a masa kawiah, i chiana ding leh i umding dan zosia Ama dawng zing le hin, pilna lungthiam i mamaw pen chu ei pe ding a hi ti i mu'u a hi. Pilna lungthim i neilo ua leh hun mantam dan helo ding i hiu.

Khatvei chuh mite'n pathianlimasiamua, munkhat ah a kawikhawmnau a chun, pakhat pa a chu a chuamten ziang ah. Zia pathian lim chu a mailam a sam a um a, a nunglam ah sam a um pua, a mai a muthei pua, a keng teni hin tha (wings) pakhat gel a a nei a. Mite chun, "La pathian min bang la sa em?" atiu leh, aman, "Hunlemchang ka sai," atii. Zia hunlemchang chu i kiangah a um lai in kuaman i hethei puai. Aman, "Ka pathian Hunlemchang hi mite kianga a um lai in a mai ah sam in a khu zia in kuaman a mu thei pua, a nutsia phat leh a hedawk sek ua, a mat guat ua leh a nunglam ah a sam a um lo zia in a man thei tapuau in, a keng ah tha um te zia in

HINNA VÂK

a leng mangta a hi. Zia gual a chun, hunlemchang i kiang ah a um laitak in, kuama'n a he thei ngai puau in, a khel phat le a hedawk ua, lamchuum in a zammang san ta a hi," atii. Mi tamzaw chun i hun man pha, damlaini hi i Lalpa tawh i matlo ziaak in lungngaina, buaina in i mangta seku a hi. Mihing in hun pathum i nei ua, hun chia tasa, tulai tak leh hun hung tung ding hi a hi. Mi khenkhat in tulai hun a mat phatlo ziaakun hun chiatasate a gel leh a lungkham in, hun hung tung dingle a huphul seku a hi. I hun zosia lak in i tuni hun hi a pawimaw pen a hi. Zing hun i mat dik theina ding in i tuni hun hi mat dik a kûl hi. La phuaktu'n "Kei in tunung tuma ka tia, nang in tu'n la ti zing," a ti gual in, Pathian hun chu tuhi a hi. Bible chun tu hun hi hun kipakum ahin, hukdamna ni ahi atia. Hun kipakum in kangaitha, hukdamna ni'n ka panpi hi ati a hi (2 Korinth 6:2). Tuhinle hukdam hilote

a ding ah hukdamna ni, Lalpa Jesu chu Lalpa leh Hukdampa dinga pawmna hun ding hun pha chuh a hi. Lalpa kianga pilna dawn zosia leh kizilsak nuam zosiate kona ngaithakna ni chu a hi (Matthai 11:29). Tuni hinle Jesu bel in, Lalpa nai hun a hi.

La pakhat chun, "Tuni kei a ahin, zing chu hung tunglo thei ahi," atia. Pathian bel ah kipuisak chu damsung ni tiam dan a zilsak in, ziate hi mi vangpha hi ding ahiu. Sam ziaaktu chun, zingkal in la ngilneina in ei hitai inla, ka damsung zosiau ka lim ua ka kipak theina dingun (Sam 90:14) ati gual in, i damsungu hi lawting tam ah i tumtak theina dingun thildang zosia nei leh lam, sum leh pai, In leh lo te haw sang sang in le Pathian kiang tung ngei ding ah kumtuang hinna leh thamuanna nei ngei ka hi ti kihetchianna hi i damsung niteu tiam dan phapen a la hi zaw a hi.

2024 CKNP Bial Fan

Seminar Thupi : Taksa leh Thagau ah Insung etkawldan
Paper ziktu : Rev. K. Neihsial, *Synod Moderator*

**Kangvai Pastor Bial
(September 14, 2024)**

Resource Person:

1. Pi Hoipakkim, Gen. Secy.
2. Pi Ting Zeneth, c/m



**Panglian Pastor Bial
(September 14, 2024)**

Resource Person:

1. Pi Damjohny, Treasurer
2. Pi Pautinting, c/m



Kipak zing ding ka tel zawi, ka damtheina â ding ah pha a hi ziaak in ~ **Voltaire**

Lunggil lungngai chu natna hik tizat umtak gual a hi ~ **John Steinbeck**

Khua leh tui pha hina leh damtheina chu gam leh nam â ding ah go thupi pen a hi
~ **Winston Churchill**

Kipak tak ah nui leh tui tak ah imut thei hi doctor te lekhabu a chun damdawi
phapen a hi ~ **Irish Thupil**

Hausatna diktak chu dangka leh sana hilo in, damtheina hih a hi. ~ **Mahatma
Gandhi**



SUNNA

UPA BT HENA

(January 2, 1949 - January 25, 2024)



Upa BT Hena (a min tak Thangtinhen) hi (L) Pu Jamkholet leh (L) Pi Thiamkhoniang te kal ah gil a ga cha a thumna a hi. Date 2.1.1949 kum in Sangkhua'n a piang hi.

Kum 1980 kum in Pi Hoitindim d/o Pu Damvung tawh Kochuam Dan Thiangtho in Pastor Lamzakhai in a khutsui hi. Pathian malzawlina cha Numei Panga (5) anei ui.

Nasepna lam:

Kum 1975-77 sung in Kawlhen Male Voice in a la pang ah, mun chuam chuam in Pathian chawihawina La sa'n a vakvel vel hi. 1990 vel in Kailamchung YCO Member pawimaw tak in a la pang hi. Kum 2001 December tha ni 16 in Pastor Soikhothang in Church of God (Full Gospel) Biak-In Haukhuangphai khua in Upa din a la Namdet hi. 2003 kum in Thengra Leikai, MPCS Lamka Kochuam ah lawi in a Upa hina sawm in Lalgam na a hun semzawm tou a,

Kochuam in -

Treasurer	- 2010
Assistant Secretary	- 2012-2013
Synod Treasurer	- 2015

Bial ah -

Sunday School Committee	- 2009-2010
Standing Committee Member	- 2011-2014

October 2024

Presbytery ah -

Nomination Committee

- 2015-2016

A hun nunung lam:

Kum 2020 vel ah pat in Zunthum a hi hetdaw nung in thei dan dan ah etkawl ahi zinglai in January 25, 2024 sun 12:30 vel in ei la beisantai, Kochuam in le ei beisanna chung a hi ka sùn takzet ui.

Vuiliamna:

Inlam ah Kochuam Programme Bialtu Pastor Vanlalchhuanga in hun mang in, Biak-In a Kochuam Lapawl te'n La sa in Upa Nengkhothang, Lamka North Presbytery Moderator in thamuanna thu gen in ît tak in a vui tai.

*Report petu,
Upa Lunkhokai
Secretary
Lamka Kochuam*